

„Við erum búin að fræðast nóg, nú viljum við frekar skemmta okkur“

— Öldungadeildin að nálgast fertugsaldurinn

Öldungadeild Félags íslenskra hjúkrunarfræðinga er langfjölmennust af þeim 24 fagdeildum sem starfræktar eru innan félagsins. Meðlimir fagdeildarinnar eru alls 521, eða hátt í einn af hverjum tíu félagsmönnum, og fer ört fjölgandi. Félagar í Fíh 60 ára og eldri geta sótt um aðild að deildinni en fjöldi félaga er enn í vinnu. Markmið deildarinnar er fyrst og fremst að hjúkrunarfræðingar hitti hver annan, haldi venskap og gleðjist saman. „Við erum búin að fræðast nóg, nú viljum við frekar skemmta okkur,“ segir Steinunn Sigurðardóttir, formaður fagdeildarinnar.



Stjórn öldungadeildar. Talið frá vinstri: Guðbjörg Guðbergsdóttir ritari, Fríða Bjarnadóttir varamaður, Guðrún Broddadóttir meðstjórnandi, Steinunn Sigurðardóttir formaður með afmælistertu Félags íslenskra hjúkrunarfræðinga, Unnur Sigtryggisdóttir varamaður, Bergdís Kristjánsdóttir gjaldkeri og Kristín Sophusdóttir varaformaður.

Þegar deildin var stofnuð, 20. október 1980 innan Hjúkrunarfélags Íslands, var hún upphaflega eingöngu ætluð eftirlaunabegum og hlaut þá nafnið Hlíf. Deildin fagnar 40 ára afmæli á næsta ári en nafninu var breytt 1995 í öldungadeild Félags íslenskra hjúkrunarfræðinga. Hlutverk deildarinnar er að styrkja samstöðu hjúkrunarfræðinga sem náð hafa 60 ára aldri, auk þess að vera tengiliður við Fíh sem gætir hagsmuna félaga sinna.

Elstu félagarnir á tíræðisaldri

Starfið er í sjálfu sér mjög hefðbundið að sögn Steinunnar, en árlega eru haldnir þrír til fjórir viðburðir. Á vorin er aðalfundur og er þá fastur liður að fá formann Fíh í heimsókn. Í byrjun sumars er farin dagsferð og í október fer fram haustfundur að kvöldi til þar sem félagar mæta í betri fötunum, hlýða á fyrirlestur og borða saman. Að lokum er jólahádegis-



fundur og er áratugahefð fyrir að hafa hangikjöt á beini og uppstúf. Dagskrá afmælisársins hefur þó verið með nokkru öðru sniði vegna fjölda viðburða og hafa félagar verið hvattir til að sækja þá. Þannig var haustlitaferð í september í stað sumarferðar. Þátttaka á viðburðum hefur verið góð og mæta á bilinu 60 til 150 manns og elstu félagarnir sem mæta eru yfir 90 ára gamlir. Flestir mæta á jólafund félagsins en vegna hátíðardagskrárinnar í Hörpu í tilefni aldarafmælis félagsins verður jólafundi sleppt í ár.

Haustlitaferð á Þingvöllum sem farin var í september.

Mikil þörf að ræða saman og rifja upp gamla tíma

Oftar en ekki eru fundir deildarinnar með of stífa dagskrá og of lítinn tíma til að spjalla. „Við í stjórninni gerum oftast en ekki þau mistök að hafa of lítinn tíma í umræður,“ segir Steinunn. Félagarnir hafa mjög mikla þörf fyrir að setjast niður og ræða saman og rifja upp gamla tíma enda margir bekkjarfélagar og fyrrum samstarfsfélagar. „Fólk kann vel að meta að hittast fyrir fundi til að hafa nægan tíma til að spjalla og rifja upp gamla tíma.“

Fyrir utan að styrkja innbyrðis tengsl og njóta góðra stunda saman eru helstu markmið deildarinnar þau að veita félögum upplýsingar, fræðast, standa vörð um réttindi og skyldur félaga í deildinni, virkja tengsl við deildir eldri hjúkrunarfræðinga erlendis, taka þátt í stjórn og að vera nefndum Fíh til ráðgjafar.

Þá hefur félagið unnið að tveimur verkefnum undanfarin ár. Annars vegar að skora á stjórn að setja á fót muna- og minjanefnd í kjölfar þess að Hjúkrunarminjasafnið, sem var hluti af Læknaminjasafninu, var lagt niður. Að sögn Steinunnar höfðu margir félagar í deildinni áhyggjur af því að unga fólkið myndi ekki safna og halda





Frá haustlitaferðinni á Þingvöllum.

utan um muni og geyma. Þessi tillaga var samþykkt og stjórn félagsins brást mjög skjótt við og er búið að koma á fót muna- og minjanefnd. Þrír félagar fagdeildarinnar eru í stjórninni, ásamt einum frá Háskóla Íslands og Háskólanum á Akureyri. „Mjög vel mönnuð nefnd,“ segir Steinunn.

Hins vegar stóð fagdeildin fyrir því að láta endurgera slörhatt Sigríðar Eiríksdóttur. Það var samþykkt í stjórn fagdeildarinnar að fara þess á leit við félagsmenn að styrkja verkið, auk þess að fá styrk frá Fih. Slörhaturinn var síðan afhentur 19. júní þegar sögusýningin Hjúkrún í 100 ár í Árbæjarsafni var opnuð. „Ég er þess fullviss að fólk eigi eftir að meta þetta eftir hundrað ár,“ segir Steinunn. Félagar í öldungadeildinni sáu um veitingarnar við opnun sýningarinnar.



Hópurinn í Almannagjá.



„Ég er þess fullviss að fólk eigi eftir að meta þetta eftir hundrað ár,“ segir Steinunn Sigurðardóttir, formaður öldungadeildar, en það var fyrir tilstuðlan fagdeildarinnar að slörhatur Sigríðar Eiríksdóttur var endurgerður.

Sögusýningin „Hjúkrún í 100 ár“

Hjúkrún í 100 ár er yfirskrift sögusýningar í Árbæjarsafni sem sett var upp í tilefni 100 ára afmælis Félags íslenskra hjúkrunarfræðinga. Hjúkrún í 100 ár er samstarfsverkefni Félags íslenskra hjúkrunarfræðinga og Borgarsögusafns Reykjavíkur.

Á sýningunni var saga hjúkrunar rakin í samhengi við breytingar á stöðu kynjanna og þróun í tækni og vísindum

Sýningin hófst 19. júní og stóð fram til 17. nóvember 2019. Á sýningunni var saga hjúkrunar rakin í samhengi við breytingar á stöðu kynjanna og þróun í tækni og vísindum. Bergdís Kristjánsdóttir sá um að safna saman gripum fyrir hönd Fih og voru þeir fengnir að láni frá Þjóðminjasafni Íslands. Sýningin grundvallast á bók Margrétar Guðmundsdóttur, Sögu hjúkrunar á Íslandi á 20. öld. Sýningarnefndina skipuðu þau Bergdís Kristjánsdóttir og Ingbjörg Pálmadóttir frá Félagi íslenskra hjúkrunarfræðinga, og þau Helga Maureen Gylfadóttir, Jón Páll Björnsson og Íris Gyða Guðbjargadóttir frá Borgarsögusafni Reykjavíkur. Sýningarstjóri var Anna Þorbjörg Þorgrímsdóttir.

Þá hefur stjórn deildarinnar einnig skoðað réttindi félagsmanna, sem látið hafa af störfum, til sjóða félagsins og borið saman við réttindi sambærilegra stétta. „Þeirri vinnu er hvergi lokið en við sjáum til hvað kemur út úr þeim samanburði,“ segir Steinunn.



Við opnun sögusýningarinnar í Árþéttur, Hjúkrun í 100 ár. Frú Vigdís Finnbogadóttir, fyrrverandi forseti, Guðni Th. Jóhannesson forseti og Guðbjörg Pálsdóttir, formaður Fíh.



Þeir hjúkrunarfræðingar sem náð hafa 60 ára aldri og vilja skrá sig í deildina geta gert það á vefsíðu félagsins eða á skrifstofu Fíh. Engin félagsgjöld eru fyrir þátttöku í deildinni. Stjórn félagsins sendir tilkynningar og fundarboð til félagsmanna í tölvupósti en í gegnum almenna póstþjónustu til þeirra sem hafa ekki aðgang að interneti.